

現代生活藝術系列

# 華嚴經疏論纂要

112

—入法界品 之十五

華藏淨宗學會印贈

大方廣佛華嚴經疏論纂要卷第一百之十二

五臺山清涼國師澄觀疏鈔

太原方山長者李通玄論

闕鼓山私淑比丘道霈纂要

入法界品第三十九之十五

○自下大文第二。從摩耶下。有十一人。明會緣入實相。謂會前諸位差別之緣。令歸一實法界。生於佛果。如摩耶生佛。故次明之。然人雖十一。約法唯九。約會爲十。初一爲總。餘九爲別。故摩耶得智幻法門。末後亦得幻住。始終相會。該於中

間。總別圓融。歸實無二。故摩耶既會緣入實。何  
得更須十人。豈不向言總別相會。非別無以成  
總故。又顯是所會之緣。語十表其無盡。無盡之  
緣。皆成摩耶之實德故。又此一相。義當等覺。等  
覺方能親生佛故。等覺卻入重玄門中。故有十  
人多明入俗。初天主光。且須正念無失。次可爲  
世師。徧窮衆藝。字智之門。無依無盡。無著清淨。  
清淨則淨智發光。發光則智相無盡。無盡則誠  
願不違。方能還歸幻住。故雖十。不失入實之  
言。始末皆幻。方知諸緣體虛卽實。鈔初天主光  
且須正念無

失者彼得菩薩解脫。名無礙。念清淨莊嚴。故二  
可爲世師。卽徧友。不得法門。二徧窮下。卽善知  
衆藝童子。得解脫。名善知衆藝。而廣說字。母四  
無依無盡。則賢勝優婆夷。得無依處道場。又得  
三昧。名爲無盡。故五無著清淨。卽堅固解脫。長  
者。得解脫。名無著。念清淨莊嚴。故六清淨。則淨  
智發光者。卽妙月長者。得解脫。名淨智光明。故  
七發光。則智相無盡者。卽無勝軍長者。得無相  
解脫。故八無盡。則誠願不違者。卽最寂靜婆羅  
門。得解脫。名誠願語。故九方能還歸。幻住者。卽  
德生有德。幻住法門。故。今初總結。今初總中。文亦具六。第一依  
教趣求中二。初將詣觀成。後勝緣引導。今初

爾時善財童子。一心欲詣摩耶夫人所。卽時獲得觀  
佛境界。智作如是念。是善知識。遠離世間。住無所住。  
超過六處。離一切著。知無礙道。具淨法身。以如幻業。

而現化身。以如幻智而觀世間。以如幻願而持佛身。  
隨意生身。無生滅身。無來去身。非虛實身。不變壞身。  
無起盡身。所有諸相皆一相身。離二邊身。無依處身。  
無窮盡身。離諸分別如影現身。知如夢身。了如像身。  
如淨日身。普於十方而化現身。住於三世無變異身。  
非身心身。猶如虛空所行無礙。超諸世眼。唯是普賢  
淨目所見。如是之人。我今云何而得親近承事供養。  
與其同住。觀其狀貌。聽其音聲。思其語言。受其教誨。  
〔疏於中三〕初標將詣觀成。次作如是下。別明觀念。  
後如是之人下。思欲親承。今初摩耶。昔云天后。天

后能生佛故。權教中說。生佛七日。命終生天。而晉經指在迦毘羅城。則顯常不滅矣。又上云。此世界者。亦表卽佛境界。故得觀佛境智。然說摩耶。或云是實非化。或云是化非實。或云亦化亦實。或云非化非實。皆帶方便。約此宗說。卽法界實德。人法圓融。二別明觀念中。初總念勝德。已能闇合願智幻門。後隨意生下。別念一十七身。唯普眼見。冥契下文。天后所現。鈔已闇合願智幻門者。以今文云。具淨法身。以如幻業。而現化身。以如幻智。而觀世間等。故冥契下文。天后所現下。見正三報。現無量身雲。今此未見。已知現身。故云冥契。三思欲親承。可知。

○二勝緣引導中三初城神顯教修心次身衆神密加受法三法堂羅刹教求友之方今初

作是念已有主城神名曰寶眼眷屬圍繞於虛空中而現其身種種妙物以爲嚴飾手持無量衆色寶華以散善財

疏於中三一以散華二正以言教三結讚徵釋初可知

作如是言善男子應守護心城謂不貪一切生死境界應莊嚴心城謂專意趣求如來十力應淨治心城謂畢竟斷除慳嫉諂誑應清涼心城謂思惟一切諸

法實性應增長心城。謂成辦一切助道之法。應嚴飾心城。謂造立諸禪解脫宮殿。應照耀心城。謂普入一切諸佛道場。聽受般若波羅蜜法。應增益心城。謂普攝一切佛方便道。應堅固心城。謂恒勤修習普賢行願。應防護心城。謂常專禦扞惡友魔軍。應廓徹心城。謂開引一切佛智光明。應善補心城。謂聽受一切佛所說法。應扶助心城。謂深信一切佛功德海。應廣大心城。謂大慈普及一切世間。應善覆心城。謂集眾善法以覆其上。應寬廣心城。謂大悲哀愍一切眾生。應開心城門。謂悉捨所有。隨應給施。應密護心城。謂防



諸惡欲不令得入。應嚴肅心城。謂逐諸惡法不令其住。應決定心城。謂集一切智助道之法。恒無退轉。應安立心城。謂正念三世一切如來所有境界。應瑩徹心城。謂明達一切佛正法輪修多羅中所有法門。種種緣起。應部分心城。謂普曉示一切衆生。皆令得見薩婆若道。應住持心城。謂發一切三世如來諸大願海。應富貴心城。謂集一切周徧法界大福德聚。應令心城明了。謂普知衆生根欲等法。應令心城自在。謂普攝一切十方世界。應令心城清淨。謂正念一切諸佛如來。應知心城自性。謂知一切法皆無有性。應知

心城如幻。謂以一切智了諸法性。

〔疏〕二正以言教。有三十門。分三。一。明十度行。有十二門。初施。後智。各有二句。中八各一。城神既爾。令護心城。是知無有一事一塵非法門矣。心名城者。蓋其中有正覺法王。萬德所聚故。二應扶下。有十句。卽初地淨治地法十種勝行。文小不次。而數全足。一信。次慈。三堅固。四悲。五捨。六七皆慚愧。謂不容惡故。八無疲厭。九如說修行。十知諸經論。十一卽成就世智。故能普曉衆生。三應住持下。有七句。福智圓滿。上二是福。下五是智。前三權智。後二

實智

佛子菩薩摩訶薩。若能如是淨修心城。則能積集一切善法。何以故。蠲除一切諸障難故。所謂見佛障。聞法障。供養如來障。攝諸衆生障。淨佛國土障。善男子。菩薩摩訶薩。以離如是諸障難故。若發希求善知識心。不用功力。則便得見。乃至究竟。必當成佛。

疏三結讚徵釋。及成勝益

○二身衆神密加授法

爾時有身衆神。名蓮華法德。及妙華光明。無量諸神。前後圍繞。從道場出。住虛空中。於善財前。以妙音聲。

種種稱歎。摩耶夫人從其耳璫。放無量色相光明網。普照無邊諸佛世界。令善財見十方國土一切諸佛。其光明網右繞世間經一匝已。然後還來入善財頂。乃至徧入身諸毛孔。善財卽得淨光明眼。永離一切愚癡闇故。得離翳眼。能了一切衆生性故。得離垢眼。能觀一切法性門故。得淨慧眼。能觀一切佛國性故。得毗盧遮那眼。見佛法身故。得普光明眼。見佛平等不思議身故。得無礙光眼。觀察一切刹海成壞故。得普照眼。見十方佛起大方便轉正法輪故。得普境界眼。見無量佛以自在力調伏衆生故。得普見眼。觀一

切剎諸佛出興故

〔疏〕文三。初讚友令欣。二從其下。放光加被。皆可知。三善財下獲益。所謂十眼。不思議身者。十身無礙。故佛平等者。佛佛同故。故異於前。但明法身。餘可準思。

○三法堂羅剎教求友之方

時有守護菩薩法堂羅剎鬼王名曰善眼。與其眷屬萬羅剎俱於虛空中。以衆妙華散善財上。作如是言。善男子。菩薩成就十法。則得親近諸善知識。何等爲十。所謂其心清淨。離諸諂誑。大悲平等。普攝衆生。知

諸衆生無有真實。趣一切智。心不退轉。以信解力。普  
入一切諸佛道場。得淨慧眼。了諸法性。大慈平等。普  
覆衆生。以智光明。廓諸妄境。以甘露雨。滌生死熱。以  
廣大眼。徹鑒諸法。心常隨順。諸善知識。是爲十。復次  
佛子。菩薩成就十種三昧門。則常現見諸善知識。何  
等爲十。所謂法空清淨輪三昧。觀察十方海三昧。於  
一切境界不捨離。不缺減三昧。普見一切佛出興三  
昧。集一切功德藏三昧。心恒不捨善知識三昧。常見  
一切善知識。生諸佛功德三昧。常不離一切善知識  
三昧。常供養一切善知識三昧。常於一切善知識所

無過失三昧。佛子。菩薩成就此十三昧門。常得親近諸善知識。又得善知識轉一切佛法輪三昧。得此三昧已。悉知諸佛體性平等。處處值遇諸善知識。說是語時。善財童子仰視空中而答之言。善哉善哉。汝爲哀愍攝受我故。方便教我見善知識。願爲我說。云何往詣善知識所。於何方處城邑聚落求善知識。羅刹答言。善男子。汝應普禮十方求善知識。正念思惟一切境界求善知識。勇猛自在徧遊十方求善知識。觀身觀心如夢如影求善知識。

疏文三。初教。二。初教十法增其智。何等下。徵釋。有

十一心。一。直心。二。悲心。三。智。四。進。五。信。六。淡。七。慈。  
八。淨。九。益。十。巧。十一。常。後是爲下結。二。復次下。示  
三。昧息其亂。三。初標。二。何等下。徵釋。於境不捨離  
等者。凡夫染境。二。乘捨境。權教縱觀空有互陳。竝  
爲缺減。若圓修者。觸目對境。窮盡法源。不取不捨。  
故央掘經云。摩訶行者。所謂彼眼根於諸如來常。  
了了分明見。具足無減修等。又云。所謂眼入處。於  
諸如來常。明見來入門。具足無減修等。餘可知。三。  
佛子下結。處處遇友者。既定慧雙遊。無境不契。竝  
爲道品。則真友懸通。能如是行。爲護正法堂也。鈔故



央掘經等者。央掘之緣。玄中已引。今直釋所引之義。然第二經後。世尊令其受三歸。依答云。我唯一依佛。卽是法。法卽僧。故意明一學。至第三卷。佛問云。何爲一學。偈云。一切衆生命。皆由飲食住。是則聲聞乘。斯非摩訶衍。所謂摩訶衍。離食常堅固云。何名爲一。謂一切衆生。皆以如來藏。畢竟常安住。次二。謂名色。三。謂三種受。四。謂四諦等。然此卽云。何名爲五。所謂彼五根。是則聲聞乘。斯非摩訶衍。所謂彼眼根。於諸如來。常決定分明見。具足無減。修耳聞。鼻嗅。舌嘗。身觸。一同於眼。然有二本。一本云。了了分明。一本云。決定分明也。次云。云何名爲六。所謂六入處。是則聲聞乘。斯非摩訶衍。所謂眼入處。於諸如來。常明見。來入門。具足無減。修。聞嗅。嘗觸。皆同眼也。意入處云。所謂意入處。明說如來常不起違逆心。淨信來入門。義如疏釋。徧歷七覺。八正。九定。十力。皆舉大折小。說如來藏。如來常樂我淨。爲無缺減也。故疏云。餘可知。可知。二說是下。有二。一則例央掘。二例此中。餘三昧等。一說。是下。問。三羅刹下答。文有四法。一以友無不在。故。二以

法爲體故。三身同友。徧故。四智與境合。故如夢如影。又前三離境界相。四則離心緣相。求善友者。幸思此言。已上第一依教趣求竟。

○第二見敬諮問三。初見

爾時善財受行其教。卽時覩見大寶蓮華從地涌出。金剛爲莖。妙寶爲藏。摩尼爲葉。光明寶王以爲其臺。衆寶色香以爲其鬚。無數寶網彌覆其上。於其臺上。有一樓觀。名普納。十方法界藏。奇妙嚴飾。金剛爲地。千柱行列。一切皆以摩尼寶成。閻浮檀金以爲其壁。衆寶瓔珞四面垂下。階陛欄楯周匝莊嚴。其樓觀中。

有如意寶蓮華之座。種種衆寶以爲嚴飾。妙寶欄楯。寶衣間列。寶帳寶網以覆其上。衆寶繒旛周帀垂下。微風徐動。光流響發。寶華幢中。雨衆妙華。寶鈴鐸中。出美音聲。寶戶牖間。垂諸瓔珞。摩尼身中。流出香水。寶象口中。出蓮華網。寶師子口。吐妙香雲。梵形寶輪。出隨樂音。金剛寶鈴。出諸菩薩大願之音。寶月幢中。出佛化形。淨藏寶王。現三世佛受生次第。日藏摩尼。放大光明。徧照十方一切佛刹。摩尼寶王。放一切佛圓滿光明。毗盧遮那。摩尼寶王。興供養雲。供養一切諸佛如來。如意珠王。念念示現普賢神變。充滿法界。

須彌寶王。出天宮殿。天諸采女。種種妙音。歌讚如來。不可思議微妙功德。

〔疏〕文三。初覩依。二初受行其教。躡前起後。近躡羅刹之言。遠通前三勝友。以前二神。並未。有答故。卽由前三位調練。故得覩斯勝報。後卽時下。正明所見於中。三初明蓮華。所證法界。自性無染。故曰蓮華。無明旣開。不離心內。如從地涌。亦表性淨。萬行之因。從法性地而出現故。此卽十定中普賢之華也。二於其臺下。明臺上樓觀。謂能證權實二智。依於所證。而重現故。智包無外。云普納十方。總攝五

位自分勝進。故云千柱行列。其一一事。皆有所表。

恐厭繁文。三其樓觀下。明樓中寶座。卽智體自空。

故云樓中有座。空具性德。故廣顯莊嚴。鈔普賢之  
華者。此中

雖不舉華量。十  
定云。無有邊際。

爾時善財見如是座。復有無量衆座圍繞。摩耶夫人在彼座上。於一切衆生前現淨色身。所謂超三界色身。已出一切諸有趣故。隨心樂色身。於一切世間無所著故。普周徧色身。等於一切衆生數故。無等比色身。令一切衆生滅倒見故。無量種種色身。隨衆生心種種現故。無邊相色身。普現種種諸形相故。普對現色

身。以大自在而示現故。化一切色身。隨其所應而現前故。恒示現色身。盡衆生界而無盡故。無去色身。於一切趣無所滅故。無來色身。於諸世間無所出故。不生色身。無生起故。不滅色身。離語言故。非實色身。得如實故。非虛色身。隨世現故。無動色身。生滅永離故。不壞色身。法性不壞故。無相色身。言語道斷故。一相色身。無相爲相故。如像色身。隨心應現故。如幻色身。幻智所生故。如燄色身。但想所持故。如影色身。隨願現生故。如夢色身。隨心而現故。法界色身。性淨如空故。大悲色身。常護衆生故。無礙色身。念念周徧法界。

故。無邊色身。普淨一切衆生故。無量色身。超出一切  
語言故。無住色身。願度一切世間故。無處色身。恒化  
衆生不斷故。無生色身。幻願所成故。無勝色身。超諸  
世間故。如實色身。定心所現故。不生色身。隨衆生業  
而出現故。如意珠色身。普滿一切衆生願故。無分別  
色身。但隨衆生分別起故。離分別色身。一切衆生不  
能知故。無盡色身。盡諸衆生生死際故。清淨色身。同  
於如來無分別故。如是身者。非色。所有色相如影像  
故。非受。世間苦受究竟滅故。非想。但隨衆生想所現  
故。非行。依如幻業而成就故。離識。菩薩願智空無性

故。一切衆生語言斷故。已得成就寂滅身故。爾時善財童子。又見摩耶夫人隨諸衆生心之所樂。現超過一切世間色身。所謂或現超過他化自在天女身。乃至超過四大天王天女身。或現超過龍女身。乃至超過人女身。

〔疏〕二見友正報於中二。先結前標後。前但明主座。今雙結主伴。後所謂下。別顯身雲。於中亦二。先明身相。後顯身業。前中亦二。先明萬類難思身。後明一類超色身。前中亦二。先顯別相。後明通體。今初有四十身。於中或唯約事。如普徧色身。或唯約理。



如十二二十三不生不滅身。以本無生起。滅亦不爲滅故。或理事交徹。如第三十二三十五。無生不生色身。以事顯理故。於中無生。則約自願所成。無別有生。不生。則隨他而現。生卽不生。餘可思準。後如是身者下。明其通體。謂離有取蘊故。二爾時善財下。明一類超勝身。約唯女故。

現如是等無量色身。饒益衆生。集一切智助道之法。行於平等檀波羅蜜。大悲普覆一切世間。出生如來無量功德。修習增長一切智心。觀察思惟諸法實性。獲深忍海。具衆定門。住於平等三昧境界。得如來定。

圓滿光明消竭衆生煩惱巨海。心常正定。未嘗動亂。恒轉清淨不退法輪。善能了知一切佛法。恒以智慧觀法實相。見諸如來。心無厭足。知三世佛出興次第。見佛三昧常現在前。了達如來出現於世。無量無數。諸清淨道。行於諸佛虛空境界。普攝衆生。各隨其心。教化成就。入佛無量清淨法身。成就大願。淨諸佛刹。究竟調伏一切衆生。心恒徧入諸佛境界。出生菩薩自在神力。已得法身清淨無染。而恒示現無量色身。摧一切魔力。成大善根力。出生正法力。具足諸佛力。得諸菩薩自在之力。速疾增長一切智力。得佛智光。

普照一切。悉知無量衆生心海。根性欲解種種差別。其身普徧十方刹海。悉知諸刹成壞之相。以廣大眼見十方海。以周徧智知三世海。身普承事一切佛海。心恒納受一切法海。修習一切如來功德。出生一切菩薩智慧。常樂觀察一切菩薩從初發心。乃至成就所行之道。常勤守護一切衆生。常樂稱揚諸佛功德。願爲一切菩薩之母。

〔疏〕二明身業中二初總標。後行於平等下。別顯亦二。先明十度行。唯精進在於忍前。餘皆如次。謂初明檀次。出生下戒。戒能生長故。三修習下進。四觀

察下忍。五具衆下定。六恆轉下般若。七見諸如來  
下方便。八成就大願下願。九心恆徧入下力。十得  
佛智光下智。後修習一切如來下。明二嚴行。末爲  
佛母者。是其本行故。 初見竟

○第二設敬

爾時善財童子。見摩耶夫人。現如是等閻浮提微塵  
數諸方便門。既見是已。如摩耶夫人所現身數。善財  
亦現作爾許身。於一切處摩耶之前。恭敬禮拜。卽時  
證得無量無數諸三昧門。分別觀察。修行證入。從三  
昧起。右繞摩耶。并其眷屬。合掌而立。

〔疏〕自道已淡。故現身等彼。上二竝是任體徧應。上鈔  
二竝是任體徧應者。然此卽緣起相由門中三義。  
一諸緣各異義。二互徧相資義。三體用無礙義。今  
言任體卽諸緣各別。言徧應者卽互徧相資。卽任  
體而徧應。是第三體用無礙也。然上摩耶萬類殊  
應。卽異體中多。今此善財一類之身。徧對摩耶。卽  
同體中多。若約摩耶善財。竝不分而徧。同異雖殊  
任體徧應。義無別也。摩耶亦是同體。一卽多以隨  
所應義。無二體故。下自言非一處任。非多處任。善  
財亦是同體多。卽一。諸處善財。卽一身故。又二聖  
互望。竝合同體異體。以一摩耶。應多善財故。此卽  
摩耶爲同體。以多善財  
對摩耶故。卽善財異體。

○第三詰問

白言。大聖。文殊師利菩薩。教我發阿耨多羅三藐三  
菩提心。求善知識。親近供養。我於一一善知識所。皆

往承事無空過者。漸來至此。願爲我說。菩薩云何學菩薩行而得成就。

〔疏〕所以敘文殊等者。若約等覺。則因位極故。若約會緣。從初發心。一一善友。皆是所會之緣。同入此故。已上第二見敬諮問竟。

○第三授已法界分三。初名體。

答言。佛子。我已成就菩薩大願智。幻解脫門。

〔疏〕大有二義。一願大。願爲一切諸佛母故。二智大。智亦二義。權智卽能起大願。能成幻事。二實智。卽是般若。生佛真身。幻亦二義。一願智體虛。當相名。

幻。故上文云。幻智卽是菩薩。菩薩卽是幻智。故能無不爲。二者卽智所作生佛之義。謂於已身。不壞小而廣容。若於佛身。無生起而現起。又願收普賢。智收文殊。皆入大幻。同爲般若。亦名佛母。鈔不壞容。卽廣狹無礙門。無生起而生起。卽事理無礙門。又願收普賢等者。上約別願。今是通願。無願不收。無智不攝等。願智卽相融皆是。大幻。成不共般若。故生佛也。

○二業用二。初總。二佛子如我下別。於中有四。初爲現在遮那母

是故常爲諸菩薩母。佛子。如我於此閻浮提中迦毗羅城淨飯王家。右脇而生。悉達太子。現不思議自在。

神變。如是乃至盡此世界海所有一切毗盧遮那如  
來。皆入我身。示現誕生自在神變。又善男子。我於淨  
飯王宮菩薩將欲下生之時。見菩薩身。一一毛孔咸  
放光明。各一切如來受生功德輪。一一毛孔皆現不  
可說不可說佛刹微塵數菩薩受生莊嚴。彼諸光明  
皆悉普照一切世界。照世界已。來入我頂。乃至一切  
諸毛孔中。又彼光中。普現一切菩薩名號受生神變。  
宮殿眷屬五欲自娛。又見出家。往詣道場。成等正覺。  
坐師子座。菩薩圍繞。諸王供養。爲諸大衆轉正法輪。  
又見如來往昔修行菩薩道時。於諸佛所恭敬供養。



發菩提心淨佛國土。念念示現無量化身。充徧十方一切世界。乃至最後入般涅槃。如是等事靡不皆見。又善男子。彼妙光明入我身時。我身形量雖不踰本。然其實已超諸世間。所以者何。我身爾時量同虛空。悉能容受十方菩薩受生莊嚴諸宮殿故。

〔疏〕文二。初標爲刹海遮那母。二又善男子下。別顯生佛之相。文中四。初毛光爲先相。復分爲五。初光入身。二又彼光中下。光現變。三又見出家下。現八相。四又見如來下。現因果。五又善男子下。令身難思。謂身不大。而容十方無盡法界。

爾時菩薩。從兜率天將降神時。有十佛刹微塵數諸菩薩。皆與菩薩同願同行。同善根。同莊嚴。同解脫。同智慧。諸地諸力。法身色身。乃至普賢神通行願。悉皆同等。如是菩薩前後圍繞。又有八萬諸龍王等。一切世主乘其宮殿。俱來供養。菩薩爾時以神通力。與諸菩薩普現一切兜率天宮。一一宮中。悉現十方一切世界閻浮提內受生影像。方便教化無量衆生。令諸菩薩離諸懈怠無所執著。又以神力。放大光明普照世間。破諸黑闇滅諸苦惱。令諸衆生。皆識宿世所有業行。永出惡道。又爲救護一切衆生。普現其前作諸

神變現如是等諸竒特事。與眷屬俱來入我身。彼諸菩薩於我腹中遊行自在。或以三千大千世界而爲一步。或以不可說不可說佛刹微塵數世界而爲一步。

〔疏〕第二正明自在入胎。五初爾時菩薩下。眷屬翼從。二菩薩爾時下。菩薩現通。三又以神力下。光明息苦。四又爲救護下。現變入胎。五彼諸菩薩下。入已游步。

又念念中。十方不可說不可說一切世界諸如來所菩薩衆會。及四天王天。三十三天乃至色界諸梵天。

王欲見菩薩處胎神變。恭敬供養聽受正法。皆入我身。雖我腹中悉能容受。如是衆會。而身不廣大。亦不迫窄。其諸菩薩各見自處衆會道場清淨嚴飾。

〔疏〕三腹包衆海

善男子。如此四天下閻浮提中菩薩受生我爲其母。三千大千世界百億四天下閻浮提中。悉亦如是。然我此身本來無二。非一處住。非多處住。何以故。以修菩薩大願智幻莊嚴解脫門故。

〔疏〕四舉此類於百億世界。稱一性故。體周徧故。不如事故。又上句不壞多故。下句不壞一故。又上句

理如事故。下句事如理故。又一與多相卽入故。此並釋中智幻之義。

○二爲過去諸佛母。三善男子下。爲賢劫千佛母。義通三世。四如於此下。結通橫豎無窮。

善男子。如今世尊我爲其母。往昔所有無量諸佛。悉亦如是。而爲其母。善男子。我昔曾作蓮華池神。時有菩薩於蓮華藏。忽然化生。我卽捧持瞻侍養育。一切世間皆共號我爲菩薩母。又我昔爲菩提場神。時有菩薩於我懷中。忽然化生。世亦號我爲菩薩母。善男子。有無量最後身菩薩。於此世界種種方便。示現受

生我皆爲母。善男子。如此世界賢劫之中過去世時。拘留孫佛。拘那含牟尼佛。迦葉佛。及今世尊釋迦牟尼佛。現受生時。我爲其母。未來世中彌勒菩薩從兜率天將降神時。放大光明普照法界。示現一切諸菩薩衆受生神變。乃於人間生大族家。調伏衆生。我於彼時亦爲其母。如是次第。有師子佛。法幢佛。善眼佛。淨華佛。華德佛。提舍佛。弗沙佛。善意佛。金剛佛。離垢佛。月光佛。持明佛。名稱佛。金剛楯佛。清淨義佛。紺身佛。到彼岸佛。寶燄山佛。持炬佛。蓮華德佛。名稱佛。無量功德佛。最勝燈佛。莊嚴身佛。善威儀佛。慈德佛。無

住佛。大威光佛。無邊音佛。勝冤敵佛。離疑惑佛。清淨佛。大光佛。淨心佛。雲德佛。莊嚴頂髻佛。樹王佛。寶璫佛。海慧佛。妙寶佛。華冠佛。滿願佛。大自在佛。妙德王佛。最尊勝佛。栴檀雲佛。紺眼佛。勝慧佛。觀察慧佛。熾盛王佛。堅固慧佛。自在名佛。師子王佛。自在佛。最勝頂佛。金剛智山佛。妙德藏佛。寶網嚴身佛。善慧佛。自在天佛。大天王佛。無依德佛。善施佛。燄慧佛。水天佛。得上味佛。出生無上功德佛。仙人侍衛佛。隨世語言佛。功德自在幢佛。光幢佛。觀身佛。妙身佛。香燄佛。金剛寶嚴佛。喜眼佛。離欲佛。高大身佛。財天佛。無上天

佛。順寂滅佛。智覺佛。滅貪佛。大燄王佛。寂諸有佛。毗  
舍佉天佛。金剛山佛。智燄德佛。安隱佛。師子出現佛。  
圓滿清淨佛。清淨賢佛。第一義佛。百光明佛。最增上  
佛。深自在佛。大地王佛。莊嚴王佛。解脫佛。妙音佛。殊  
勝佛。自在佛。無上醫王佛。功德月佛。無礙光佛。功德  
聚佛。月現佛。日天佛。出諸有佛。勇猛名稱佛。光明門  
佛。娑羅王佛。最勝佛。藥王佛。寶勝佛。金剛慧佛。無能  
勝佛。無能映蔽佛。衆會王佛。大名稱佛。敏持佛。無量  
光佛。大願光佛。法自在不虛佛。不退地佛。淨天佛。善  
天佛。堅固苦行佛。一切善友佛。解脫音佛。遊戲王佛。



滅邪曲佛。瞻蔔淨光佛。具衆德佛。最勝月佛。執明炬  
佛。殊妙身佛。不可說佛。最清淨佛。友安衆生佛。無量  
光佛。無畏音佛。水天德佛。不動慧光佛。華勝佛。月燄  
佛。不退慧佛。離愛佛。無著慧佛。集功德蘊佛。滅惡趣  
佛。普散華佛。師子吼佛。第一義佛。無礙見佛。破他軍  
佛。不著相佛。離分別海佛。端嚴海佛。須彌山佛。無著  
智佛。無邊座佛。清淨住佛。隨師行佛。最上施佛。常月  
佛。饒益王佛。不動聚佛。普攝受佛。饒益慧佛。持壽佛。  
無滅佛。具足名稱佛。大威力佛。種種色相佛。無相慧  
佛。不動天佛。妙德難思佛。滿月佛。解脫月佛。無上王

佛希有身佛。梵供養佛。不瞬佛。順先古佛。最上業佛。順法智佛。無勝天佛。不思議功德光佛。隨法行佛。無量賢佛。普隨順自在佛。最尊天佛。如是乃至樓至如來。在賢劫中。於此三千大千世界當成佛者。悉爲其母。如於此三千大千世界如是。於此世界海十方無量諸世界一切劫中。諸有修行普賢行願爲化一切諸衆生者。我自見身悉爲其母。

疏已上文俱可知。 一業用竟

○三辨法眼根源

爾時善財童子。白摩耶夫人言。大聖。得此解脫。經今

幾時。答言。善男子。乃往古世。過不可思議。非最後身。菩薩神通。道眼所知。劫數爾時。有劫名淨光。世界名須彌德。雖有諸山。五趣雜居。然其國土。衆寶所成。清淨莊嚴。無諸穢惡。有千億四天下。有一四天下名師子幢。於中有八十億王城。有一王城名自在幢。有轉輪王名大威德。彼王城北。有一道場。名滿月光明。其道場神名曰慈德。時有菩薩名離垢幢。坐於道場。將成正覺。有一惡魔名金色光。與其眷屬無量衆俱。至菩薩所。彼大威德轉輪聖王。已得菩薩神通自在。化作兵衆。其數倍多。圍繞道場。諸魔惶怖。悉自奔散。故

彼菩薩得成阿耨多羅三藐三菩提。時道場神見是事已。歡喜無量。便於彼王而生子想。頂禮佛足。作是願言。此轉輪王在在生處。乃至成佛。願我常得與其爲母。作是願已。於此道場。復曾供養十那由他佛。善男子。於汝意云何。彼道場神豈異人乎。我身是也。轉輪王者。今世尊毗盧遮那。是我從於彼發願已來。此佛世尊於十方刹一切諸趣。處處受生。種諸善根。修菩薩行。教化成就一切衆生。乃至示現住最後身。念念普於一切世界。示現菩薩受生神變。常爲我子。我常爲母。善男子。過去現在十方世界無量諸佛將成。

佛時。皆於齋中放大光明來照我身。及我所住宮殿屋宅。彼最後生。我悉爲母。

〔疏〕二。初問。二。答言下。答。文中六。初輪王久遠。非後身菩薩所知者。顯唯佛知。非但久遠。亦顯時無時。相。佛智契故。二。彼王城下。有佛魔來。三。彼大威德下。聖帝助降。表智王助體。本覺現故。此時已得菩薩神通。明今始成。非實始也。四。時道場下。場神興願。智假慈興。故神於王。生如一子想。五。善男子下。結會古今。六。我從於彼下。爲母普周。前來爲佛生時之母。卽是願母。此明爲佛成道時母。卽是智母。

齋中放光者。生長同氣之所。表佛佛皆從無二理  
生故。

善男子。我唯知此菩薩大願智幻解脫門。如諸菩薩  
摩訶薩具大悲藏。教化衆生常無厭足。以自在力。一  
一毛孔示現無量諸佛神變。我今云何能知能說。彼  
功德行。善男子。於此世界三十三天。有王名正念。其  
王有女名天主光。汝詣彼問。菩薩云何學菩薩行。修  
菩薩道。時善財童子敬受其教。頭面作禮。繞無數匝。  
戀慕瞻仰。却行而退。

疏後二段可知

論摩耶夫人總相中。以三法而成別相中。以等佛數衆生數。行門而得其名。三法者。一以等一切諸佛衆生平等無相。自體清淨法身妙理爲體。二以等一切諸佛衆生平等理中。普光明無作無依之智爲體。三以等一切諸佛衆生無作理智之中。無作性長養一切衆生。饒益大慈大悲。與一切衆生本同一體。自他性亡。恆爲利益。不求恩報。此乃天真本然。衆生共有。依此三法行之。卽是雖然衆生共有。而衆生迷之者。須具方便行門。起發顯明。方得。云何方便。其方便有十大願門。如願修學。一願

初發心時。起等一切衆生。數慈悲大願。皆當救度。一切衆生。令出三界苦。皆令成佛。二願承事恭敬。供養十方一切諸佛。無空過者。三願於諸世界中。所生之處。有德藝過己之人。奉事修學。雖學諸藝。智出人天。不生憍慢。恆以大慈大悲爲首。四願恆以四念處觀。隨病治之。立四正勤。成就根力。五願恆以七覺分。不離心首。長諸正慧。照十二緣生。成大智海。六願恆以八正道行。無始無終。常現在前。七願自己八正道現前。常住世間。利益人天。一切六道衆生。自己不樂別求餘方淨土。明見一切法。



界之門。淡知染淨。本從妄起。依真本無。八願於菩薩五位行門。明知法則。所有十住。十行。十迴向。十地。十一地。中方便。及諸三昧利人天法。一念徧周。善知其趣。次第修行。九願常念本願風輪以持本智。鼓揚無邊諸波羅密行。等十方界對現色身。應根接引一切衆生。十願常以大慈悲身起一切智。如理徧周法界。大智普照。不遺一物平等普資。此是摩耶夫人身所成之行。若修行者。應如是修。無有一佛不從大願海大悲智生。是故經云。但行普賢行願。所願皆從我生。表此十一地智從悲起。十

地已前大慈大悲之行。皆以本願。及以從根本智  
生。有修學長養。十一地一切功終。純是大慈悲爲  
法界體。以悲生智。幻生等衆生數身。常爲利益。曾  
無休息。名爲生佛。非要得三十二相。乃至九十七  
相。但初發心時。一分會眞。智悲同起。雖未得通化。  
變易自在。法是一同。知見眞故。如是修學。如是悟  
入。方名初發心時。便成正覺。亦名以佛知見示悟  
衆生。欲令衆生入佛知見。從此摩耶夫人表十一  
地。初門已後。九箇善知識。總明從大慈悲爲母體。  
皆從母行。以智幻生。悲智徧周。十方普現。不作階

級次第對治。已後善知識。雖亦云。我唯知此法門。餘不能知者。以明同中具別。表普賢差別智隨俗徧周。非如十地已前。滯障不達。此之十一地。但顯修行。十一地行滿。此普賢十一地位。顯德徧周。行備塵俗。無求出世。自天主光已去。總是同世凡流。不標神相異狀。與世人一種。但有法利人。明十地已前。是修悲智自己出世聖道法門。十一地是自以大慈悲心。行赴俗濟生之門。表自出世道滿。無更求解脫離染離淨之心。但以乘法性船。張大慈悲帆。以大智爲船師。順本願風。吹諸波羅密網。常

遊生於海。漉一切衆生有著之魚。安置無依。普光明之智岸。常生一切幻住。萬行功德法界無礙寶堂。如下慈氏所居樓閣是。如善財得羅刹王爲說求善知識法。令善財普禮十方。正念思惟一切境界。勇猛自在徧遊十方。觀身觀心。如夢如幻如影。求善知識。爾時善財受行其教。卽時覩見大寶蓮華。從地涌出者。明十方求善知識者。明自身心內外十方。以法諦求。有何體性。令稱法身。又令觀身觀心如夢如影者。令達其相。達性達相如影。通同無二。便入智幻生門。是見摩耶夫人也。初見蓮華。

從地涌出者。以自性清淨法身為地體。一切萬行蓮華從此生故。金剛爲莖者。是根本智。明一切差別行差別智。從法身根本智生。設是有此境界莊嚴。亦是此依報也。終不別有報因果也。妙寶藏者。慈悲含育報生也。摩尼爲葉者。行無垢報生也。光明寶王以爲其臺者。以根本智現照用自在所報生也。衆寶色香以爲鬚者。戒定慧解脫解脫知見香所報生也。無數寶網彌覆其上者。以能施教網報生也。上有樓觀者。差別智報生。名普納十方法界藏者。以大智徧周教網普覆所報生也。奇妙嚴

飾者。妙行報嚴故。金剛爲地者。法身報生也。千柱  
行列者。行有千萬行也。一切皆以摩尼寶成者。行  
行中無垢也。以閻浮檀金以爲其壁者。柔和忍辱  
之所報生也。衆寶纓絡四面垂下者。四攝之行。垂  
慈接生之所報生也。已下準此例知。教廣文長。不  
可具述。已下摩耶夫人所現徧法界身。同一切衆  
生事業等身。生一切諸如來身。如文自明。

○第二遂往天宮下十友。別明會緣。然位德已極。  
託迹凡流。淡悲接生。不標神異。但以法利人。又  
顯求者道淡。或但示法門之名。則懸領旨趣。第

一天王光。卽幻智念力善友。言天王光者。謂悲智勝用。光淨自在。破闇義故。父名正念者。此由定發故。故法門名無礙清淨念。初一句卽依教趣求。第二見彼下。見敬諮問。鈔天王光女。父名正念者。卽第三會問梵行之王也。又云往三十三天者。是摩耶捨化所生天也。則知摩耶非獨在天。故晉經云。在迦毘羅城。

遂往天宮。見彼天女禮足圍繞。合掌前住。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。

○第三示已法門

天女答言。善男子。我得菩薩解脫。名無礙念清淨莊嚴。善男子。我於此解脫力。憶念過去。有最勝劫。名青蓮華。我於彼劫中。供養恒河沙數諸佛如來。彼諸如來。從初出家。我皆瞻奉。守護供養。造僧伽藍。營辦什物。又彼諸佛。從爲菩薩住母胎時。誕生之時。行七步時。大師子吼時。住童子位在宮中時。向菩提樹成正覺時。轉正法輪。現佛神變。教化調伏衆生之時。如是一切諸所作事。從初發心。乃至法盡。我皆明憶。無有遺餘。常現在前。念持不忘。又憶過去劫。名善地。我於



彼供養十恒河沙數諸佛如來。又過去劫名爲妙德。我於彼供養一佛世界微塵數諸佛如來。又劫名無所得。我於彼供養八十四億百千那由他諸佛如來。又劫名善光。我於彼供養閻浮提微塵數諸佛如來。又劫名無量光。我於彼供養二十恒河沙數諸佛如來。又劫名最勝德。我於彼供養一恒河沙數諸佛如來。又劫名善悲。我於彼供養八十恒河沙數諸佛如來。又劫名勝遊。我於彼供養六十恒河沙數諸佛如來。又劫名妙月。我於彼供養七十恒河沙數諸佛如來。善男子。如是憶念恒河沙劫。我常不捨諸佛如來。

應正等覺。從彼一切諸如來所。聞此無礙念清淨莊嚴菩薩解脫。受持修行恒不怠失。如是先劫所有如來。從初菩薩乃至法盡。一切所作。我以淨嚴解脫之力。皆隨憶念。明了現前。持而順行。曾無懈廢。

〔疏〕於中二。先標名。謂以一念無礙智。普觀三世無不明現。而無去來今。爲無礙念。不雜異念。爲清淨念。念佛功德。有益悲智。故曰莊嚴。後善男子下。明業用。於中三一。念最初一劫。二又憶下。中間諸劫。三善男子如是憶下。總結多劫。非唯憶念。亦於彼多劫多佛。聞持此門。

善男子。我唯知此無礙念清淨解脫。如諸菩薩摩訶  
薩。出生死夜朗然明徹。永離癡冥未嘗昏寐。心無諸  
蓋。身行輕安。於諸法性清淨覺了。成就十力開悟羣  
生。而我云何能知能說彼功德行。善男子。迦毗羅城。  
有童子師名曰徧友。汝詣彼問。菩薩云何學菩薩行。  
修菩薩道。時善財童子以聞法故。歡喜踊躍。不思議  
善根自然增廣。頂禮其足。繞無數匝。辭退而去。

〔疏〕後三段並可知。下諸善友六段之文。多有不具。  
皆可思準。

〔論〕王名正念者。明智淨自在如天王。正念者。表淨

智無念而自在。任理施爲。不爲而萬事自爲。明十  
一地淨智。任運應現也。在十任位中。但名正念天  
子。問其梵行。未云有女。至此十一地中。名王。又云  
有女。明以智生悲也。有女名天主光者。表無作智  
中慈悲無染性。任用利物也。此位表智圓。用無前  
後也。取天表處。生處中自在。神化無方。非卽在於  
處所也。敬申所求云。我得菩薩解脫名無礙念。意  
明無礙念者。得三世無礙智。一念印三世古今。及  
未來一切衆生生處劫量。及一切三世諸佛成道  
劫量。一念徧知。無不了然。如今現前。以無妄念智

現前諸法本如是。故此明無妄念之正念智也。於中所有諸劫中諸佛之數。於諸劫中。或供養多佛。或供養少佛。增減不定者。是一念中無念正智。皆供養三世諸佛之數。此是無久近中久近之狀也。總無時之大圓智境。法自如是。不由修生也。修者。但自照十二緣生。達妄成智。智無所修。但自解迷。真無可作。亦無三世古今之性。此是十一地中第二地善知識。次十一地中第二地善知識已下。總明正念中無礙智用徧周。同行攝生之行身也。此方如是。十方一切世界例然。六道等徧。總從摩

耶大悲海生。以正念無作智爲體也。此是十一地中戒波羅密。以智生悲門。故女名天。主光。

○第二童子師徧友。幻智師範善知識。謂爲童蒙師。徧與衆生爲善友故。

從天宮下。漸向彼城。至徧友所。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。徧友答言。善男子。此有童子。名善知衆藝。學菩薩字智。汝可問之。當爲汝說。

**疏**居迦毘羅黃色城者。中道軌物故。不得法者。畧

有四義。一與衆藝法門同故。二法有所付。顯流通故。三表一切法門體無二故。四表無所得。方爲得故。

**論**迦毘羅城童子師。此云黃色城也。黃色者。是中宮色故。明爲此童子師。不離中道。軌治俗典。如此土孔丘之流。明世間師範門。如孔子頭頂。下如返宇。表處俗行謙之道。以身表法。像尼丘山。似彼山頂中下。非彼山因求祠而生。此俗說非也。姓孔者。聖人無名無姓。以德爲名爲姓。非以俗姓爲姓。約德以有寬明之德。以之姓孔。孔者寬也。以行化蒙

名之爲丘。丘者。山嶽之稱。以艮爲山。爲小男。爲童蒙。因行所化而立名也。故名丘也。亦以德超過俗。名之爲丘。亦至德尊重。無傾動之質。名之爲丘。生在兗州者。艮之分也。主以化小男童蒙之位。兗州上值於角。角爲天門。主衆善之門。亦主以僧尼道士。以乘角氣而生。此非世凡流之能體。故善財至此。徧友不言。而便令善財往衆藝所者。師範之法。正者不親教。付之以助教。不決之事。問之以正師。表德不孤。必有鄰。附讚成其化行也。

○第三善知衆藝。幻智字母善知識



爾時善財卽至其所。頭頂禮敬於一面立。自言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。

疏初二可知

○第三授已法門中二。初標名體

時彼童子告善財言。善男子。我得菩薩解脫。名善知衆藝。

疏名體。謂以無礙智。窮世間之伎藝故。

○二顯其業用

我恒唱持此之字母

〔疏〕字母爲衆藝之勝。書說之本。故偏明之。有標列

結列有四十二門。

鈔言字母爲衆藝之勝者。出偏示所以也。標知衆藝而偏釋故。

故智論云。諸陀羅尼。皆從分別語生。四十二字。是一切字根本。因字有語。因語有名。因名有義。菩薩若聞其字。乃至能了其義。是字初阿後荼。中有四十。得是字陀羅尼。多所成益。乃至廣說。又如本行集云。爾時菩薩爲諸童子。一一分別字之本末。乃至訓化三萬二千童子。勸發無上眞正道意。是知字爲衆藝之本。故十地。皆言般若波羅密門者。從中以喻十地爲諸法本。字入於無相智故。字義爲門故。毘盧遮那經中。皆言不可得智。無所得卽般若故。又文殊五字經云。受持此陀羅尼。卽入一切法平等。速得成就摩訶

般若纒誦一遍。如持一切八萬四千修多羅藏。然  
初五字。若準阿目佉三藏。卽全是文殊真言。若準  
今本。而第二一字不同。今依彼經釋之。皆言般若。若  
釋總標於中。三一暗引毘盧遮那經。彼有偈云。甚  
淡相無相。劣慧所不堪。爲化是等故。兼存有無說。  
釋曰。因字是有無相。智是無故。念誦瑜伽之者。先  
觀字相。後入字義也。阿字相觀云。八葉白蓮。一時  
開炳。現阿字素光色。斯卽字相也。而智表菩提心。  
悟本不生。圓滿具足。猶如月輪。卽是字義。相有義  
無。故云兼也。是以今經唱阿字時。卽是相也。入般  
若波羅密門。卽是無相。捨離字。卽名字。般若入般  
門。則顯三種般若。不相捨離。字卽名。字般若。入般  
若波羅密門。卽觀照般若。悟不生等。卽實相般若。  
也。故毘盧下第二明引遮那。又上義證。今卽文證。  
不可得言。卽般若相故。般若中廣說。無得爲般若。  
故。又文殊下第三引五字證。爲般若門。然初五字  
下。第二釋別列中。合爲四十二段。今疏有三。初別

釋五字。約五字陀羅尼經。而引不空會通字音。然古諸德於此經中。不多解釋。靜法有章。名為漩復六門分別。一釋名。二體性。三建立。四釋相。五利益。六問答。而其釋相亦廣引諸經。而不全具。又諸經字音參雜。以梵音輕重。三藏解釋。不看下義。但取字同。故多乖舛。如涅槃以阿字為噉。此中以囉字為多。此等不以義定。故多譌謬。今亦別有一章。總引十經一論。一與善譯華嚴四十二字門。二大般若第四百九十。三引大品般若第八。四放光般若第六。五光讚般若第十。六普耀經第三。七與善三藏別譯文殊問般若字母八。別譯金剛頂瑜伽字母九。涅槃第八。十卽今經言一論者。卽智度論其五字經。唯釋初之五字。今疏但用大般若及與善別譯四十二字。以二本多同。初之五字。用五字經。餘文全要鈔更引證。餘在別章。

唱阿字時入般若波羅蜜門名以菩薩威力入無差別境界

疏一阿者是無生義以無生之理統該萬法故經云無差別境而菩薩得此無生則能達諸法空斷一切障故云威力鈔今按定用五字疏文分二先字鈔卻廣引五字分爲五段文皆有三牒本經字母二以彼經義釋之三會今經之意今初阿者卽第一牒經字母卽今經云唱阿字時今但畧取所牒之字下四十一字釋義皆然二是無生義卽五字經釋義三以無生之埋下會釋今經意云諸法皆悉無生故無差別故上經云一切法無生一切法無滅若能如是解斯人見如來而大般若金剛頂全同上釋大品云阿字門一切法初不生故智論釋云若菩薩一切語法中聞阿字時卽時隨義所謂一切法從初來不生相阿提秦言初阿耨波陀秦言不生故釋曰論文二節一隨經釋義二阿提秦言初下會釋方言下四十一字皆然見此論文則知四十二字皆是所依之相從此入於無得般若故名爲般若若之門放光云阿者謂諸法來

入不見有起。光讚云。阿者。因緣之門。一切法已過去者。亦無所起。釋曰。上一經起。卽生義。因緣之門。從緣生也。文殊問經云。阿者是無常聲。普曜云。然此言云。無者是宣無常苦空無我之音。上一經似同小乘之無。若取無彼常等。卽與無生義同。此初阿字。上聲短呼。故譯涅槃。噯字當初。雖呼小異。義亦同也。故云。噯者。不破壞。故不破壞者。名曰三寶。喻如金剛。亦同無生義。

### 唱多字時入般若波羅蜜門。名無邊差別門。

疏二多者。彼經第二當囉字。是清淨無染離塵垢義。今云多者。毘盧遮那經釋多云。如如解脫。金剛頂云。如如不可得。故謂如卽無邊差別。故如不可得。此順多字義。應是譯人之誤。囉多二字。字形相近。聲相濫。故若順無塵垢釋。以無邊之門。方淨塵

垢。鈔二多者。此廣牒經也。彼經第二下。疏釋有五。一依五字釋。二今云多下。按今多釋。三如卽無邊差別者。會經也。四應是譯人下。會釋偏正。言字形相近者。今示二梵之形。匹多字。入囉字。此二小近聲相近者。同疊韻故。五若順無塵下。正以囉字會釋經文。以諸經字義第二多同。故小品云。囉字悟一切法離塵垢故。放光云。二囉者。垢貌。於諸法無有塵光讚云。是囉之門。法離塵垢。金剛頂云。囉者。一切法離故。涅槃云。囉者。能壞貪瞋癡。說真實法。亦壞塵垢義。智論云。若聞囉字。卽隨義知一切法離垢相。以囉闍秦言垢故。以上諸經皆第二囉字。同離垢義。故無惑矣。

### 唱波字時入般若波羅蜜門名普照法界

**疏**三波者。五字經云。亦無第一義諦。諸法平等。謂

真俗雙亡。是真法界。諸法皆等。卽是普照。鈔三波

及餘經論。多是跛字。今依五字。跛字釋義。大般若言。跛者。一切法勝義教。小品云。跛者。第一義故。放

光云。跋者。諸法泥洹。最第一義。文殊問經云。出勝義聲。釋曰。上諸經皆獨明第一義。但是所遣。唯金剛頂云。跋者。第一義不可得。則具般若相矣。故疏云。謂真俗雙亡下。會經前二字。以第一義遣俗。今亦無第一義。則復遣真。為雙亡真俗。是真法界。上即所照。從諸法皆等下。含普照義。智論云。若聞跋字。即知一切法入第一義。以波羅末陀。秦言第一義。故釋曰。此亦但入第一義耳。

### 唱者字時入般若波羅蜜門名普輪斷差別

疏四者者。諸法無有諸行。謂諸行既空。故徧摧差別。鈔四者。與善譯為左字。義則全同。五字經也。文中先釋義。後諸行既空下。會經大般若云。入者字門。悟一切法遠離生處。若生若處。皆無所得。釋曰。諸行。即生處體也。然諸經多明生處之行。大品涅槃義當遮字。但明出世之行。大品云。遮字修不可得。涅槃云。遮者。即是修義。調伏一切諸眾。生故。然出世行亦不可得。方為般若之門耳。智論云。若聞遮字。即時知一切法諸行皆悉非行。以遮利夜。



秦言  
行故

唱那字時入般若波羅蜜門名得無依無上

〔疏〕五那者。諸法無有性相。言說文字皆不可得。謂

性相雙亡。故無所依。能所詮亡。是謂無上。鈔五那者別譯

為曩字義全同。文中先依五字釋義。後謂性相雙

亡。下會釋經文。諸經多是那字。大般若云。聞那字

門入一切法。遠離名相。若名若相。皆以無所得而

為方便。故大品云。那字門。諸法離名。性相不同。不

失故。放光云。那者。謂於諸法。字本性亦不得。亦不

失光讚云。是那之門。一切諸法。離諸名字。計其本

淨而不可得。涅槃云。那者。三寶安住。無有傾動。喻

如門闡。釋曰。真實三寶。永離名相。智論云。若聞那

字。即知一切法。不得。不失。不遮。那經中字義。與此

來。不去。以那素。秦言不故。無殊。下多依彼經。及阿目佉所譯。而梵音輕重有

殊。釋義無別。遮那經下。會釋二文亦是結前生後。經卽毘盧遮那經。及阿目佉所譯。卽別譯華嚴四十二字門。此別譯義。旣與大般若同。則是依大般若。而有二三字音小異。故不言依耳。然阿目佉別譯。皆先牒經般若之名。而別名爲先後方釋義。次

下當見

唱邏字時入般若波羅蜜門名離依止無垢

〔疏〕六邏字。悟一切法離世間故。凌支因緣永不現

故。離世故無依。凌不現故無垢。

〔鈔〕六邏字。彼爲羅字。云稱羅字時入

無垢般若波羅密。悟一切法出世間故。凌支因緣永不現。故釋曰。今疏但引釋義。更不引經。彼與今經全同。但此別名在下。彼別名在上耳。然大品放光等。多爲邏字耳。智論云。聞邏字。卽知一切法離輕重。相以邏此云輕故。意明有感爲重。斷卽爲輕。今不可得。亦無輕矣。卽無無明盡也。卽

唱拖輕呼字時入般若波羅蜜門名不退轉方便

〔疏〕七施字。悟一切法調伏寂靜。真如平等。無分別

故。方為不退轉方便。鈔七施字。別譯為娜字。大品

文中先釋義。後方為不退轉下。會經也。智論云。若

聞陀字。知一切法善相。以陀摩。秦言善故。釋曰。調

伏寂靜。真如平等。善之極也。

唱婆蒲我切字時入般若波羅蜜門名金剛場

〔疏〕八婆字。悟一切法離縛解故。方入金剛場。鈔八

聲字。別譯及般若。皆為麼字。與蒲我反大同。文中

先釋義。後方入金剛場者。會經如佛入金剛三昧。斷為金剛。或在金剛場。則無縛解為真斷也。智論云。若聞婆字。知一切法無縛脫以婆他。此言轉故

唱茶徒解切字時入般若波羅蜜門名曰普輪

〔疏〕九茶字。悟一切法離熱矯穢。得清涼故。是普摧

義。鈔九茶字。別譯為拏字。一俱上聲。大品放光。亦

論云。若聞茶字。即知諸法不熱。天竺茶闍陀。秦言不熱故。

唱沙史我切字時入般若波羅蜜門。名為海藏。

〔疏〕十沙字。悟一切法無罣礙故。如海含像。鈔十沙字。史我切。

切。別譯為灑字。大品放光等。皆為沙字。文中先釋義。後如海含像者。會經像之與水。不相礙故。智論

云。若聞沙字。即知人身六種之相。以沙。此言六故。釋曰。以大品云。沙字門。諸法六自在。在王。性清淨故。

即內六處為六自在。在王。心海湛然。不礙見聞覺知。猶如湛海。不礙像故。

唱縛房可切字時入般若波羅蜜門。名普生安住。

〔疏〕十一縛字。悟一切法言語道斷故。能徧安住。

唱哆都我切字時入般若波羅蜜門名圓滿光

〔疏〕哆字。悟一切法真不動故。不動則圓滿發光。十鈔

二哆字。從不動則圓滿發光。會經也。如密室燈定。如止水影圓。契於如如。知無動矣。智論云。若聞哆

字。即知諸法在如中不。動。以多他。秦言如故。

唱也以可切字時入般若波羅蜜門名差別積聚

〔疏〕也字。悟如實不生故。則諸乘差別積聚。皆不可

得

唱瑟吒字時入般若波羅蜜門名並光明息煩惱

〔疏〕瑟吒字。悟一切法。制伏任持。相不可得故。普光

明。即能制伏。任持煩惱。即所制伏。息即伏義。

唱迦字時入般若波羅蜜門名無差別雲

**疏**迦字。悟作者不可得。則作業如雲。皆無差別。鈔

五迦字。悟作者不可得。此字上畧一切法。下猶有不可得。此後諸字。皆上有悟一切法。下有不可得。

疏文從簡。故並畧之。下方總說耳。從則作業如雲下。會經

唱娑蘇我切字時入般若波羅蜜門名降淫大雨

**疏**娑字。卽時平等性。鈔十六娑字。但有釋義。具

可得故。智論云。若聞娑字。知一切法。一切種不可得。以薩婆。秦言一切故。釋曰。論云。一切種智故。

唱麼字時入般若波羅蜜門名大流湍激眾峯齊峙

**疏**麼字。卽我所執性。我慢高舉。若峯齊峙。我慢則

生。成。長。流。湍。馳。奔。激。鈔十七麼字者。大品云。麼卽悟一切法。我所執性不可得。

我慢高舉下會經。智論云。若聞麼字。知一切法離我所義。以麼迦。秦言我所故。

唱伽上聲輕呼字時。入般若波羅蜜門。名普安立。

**疏**伽字。卽一切法行取性。鈔十八伽字。別譯爲誡字。義亦全同。易故不會

經。若欲會者。以行取故。而能安立。智論云。若聞伽字。卽知一切法底不可得。以伽陀。秦言底故。釋曰。

行取。卽生成底甚淡故。

唱他他可切字時。入般若波羅蜜門。名具如平等藏。

**疏**他字。卽是處所性。鈔十九他字。疏但釋義。易不

處。出生一切。終歸此故。智論云。若聞他字。卽知四句。如去不可得。以多他。阿伽度。秦言如去故。如去

卽是處所。如來時去故。

唱社字時。入般若波羅蜜門。名入世間海清淨。

**疏**社字。即能所生起。鈔二十社字別譯為惹字。但舉其義若會經者有能有所是世間海故賢首品能緣所緣力一切法出生。速滅不暫停念念念悉如是今不可得成般若矣。

唱鎖字時入般若波羅蜜門名念一切佛莊嚴

**疏**鎖字。即安隱性。鈔二十一鎖字別譯是安隱字。若會經者念佛莊嚴最安隱故。

唱施字時入般若波羅蜜門名觀察簡擇一切法聚

**疏**施字。即能持界性。鈔二十二施字別譯為馱字。義必然者以第七亦有施字。注之為上故。然經云簡擇法聚即能持界性法聚。差別即是界義各各持自性也。智論云若聞馱字。知一切法性不可得。

以馱摩此云法故。

唱奢口何切字時入般若波羅蜜門名隨順一切佛教

輪光明



**疏奢字。**卽寂靜性。鈔二十二奢字。別譯爲捨。大般

寂靜則順佛教。智論云。若聞除字。卽知諸佛寂滅相。以賒多都餓。此云寂滅故。

**唱佉字時入般若波羅蜜門名修因地智慧藏**

**疏佉字。**卽如虛空性。鈔二十四佉字。若會經者。智

聞佉字。知一切法等於虛空。不可得義。以佉伽。秦言虛空故。

**唱又**楚我切**字時入般若波羅蜜門名息諸業海藏**

**疏又字。**卽盡性。鈔二十五又。別譯爲漩。復字。若會

爲終竟須盡智論云。若聞又字。則知一切法盡不可得。以又耶。秦言盡。

**唱娑**蘇統切**多**上聲呼**字時入般若波羅蜜門名蠲諸惑**

**障開淨光明**

**疏**娑多字。卽任持處非處。令不動性。惑障爲非處。開淨光明爲其處。鈔智論云。若聞娑多字。卽知諸那。秦言是事邊不可得。釋曰。以大品云。多字門諸法有不可得。故論爲此釋。以有卽有邊。必對無。故有是妄惑。故爲非處。以爲有邊。無是真空。故名爲處。故爲無邊。惑智雙絕。卽不可得。

**唱壤字時入般若波羅蜜門名作世間智慧門**

**疏**壤字。卽能所知性。鈔二十七壤字。輕別譯爲壤字。若會經者。能所知性。卽智

慧門。能知爲智慧。智慧卽門。所知爲智慧。智慧之門。智論云。若聞惹字。卽知一切法中無智相。以惹

那。秦言智故。釋曰。但有能知。必有所耳。

**唱曷攤多**上聲呼**字時入般若波羅蜜門名生死境界**

**智慧輪**

〔疏〕曷擺多字。卽執著義性。執著爲生。成境界義。卽智

慧輪。鈔言境界義者。總有四義。一文義。是所詮義。二

境界義。是所緣境。三道理義。謂若無常等。四性

義。卽第一義空。今是第二。生。成。是果。執著是因。並

是智慧所觀境界義。智論云。若聞曷擺多字。卽知一

滿莊嚴

唱婆

蒲餓切

字時入般若波羅蜜門名一切智宮殿圓

〔疏〕婆字。卽可破壞性。圓滿之言。不空譯爲道場。然

此婆字。宜蒲餓反。諸本多云。蒲我。則與第八不殊。

〔鈔〕二十九。婆字。圓滿之言。下會經。興善譯爲道場

者。故彼云。稱婆字時。入一切宮殿道場莊嚴般若

波羅密門。以梵云。曼荼羅。通圓滿道場。二義。故智

論云。若聞婆字。了知一切法。不可得破壞相。以婆

伽。秦言破故。釋曰。經中宮殿莊嚴。以從緣故。亦可破壞。以不可得。卽非莊嚴。方爲圓滿。成般若矣。

唱車上聲呼字時入般若波羅蜜門。名修行方便藏各

別圓滿

〔疏〕車字。卽欲樂覆性。鈔三十車字。別譯爲縶。若會經文。既方便隨喜樂。故各別

圓滿。智論云。若聞車字。卽知一切法無所去。以伽車。秦言去故。

唱娑蘇紇切麼字時入般若波羅蜜門。名隨十方現見

諸佛

〔疏〕娑麼字。卽可憶念性

唱訶婆訶婆二字皆上聲呼字時入般若波羅蜜門。名觀察一

切無緣衆生。方便攝受。令出生無礙力

**疏**訶婆字。即可呼召性。無緣。召令有緣故。鈔三十二訶婆

字。別譯為訶嘯。文中釋義。無緣。召令有緣。即會經也。

唱。綫七可切字。時入般若波羅蜜門。名修行趣入一切

功德海

**疏**綫字。即勇健性。鈔若會經者。勇健。方能修入功

無慳無施。以未綫羅。秦言慳。故釋曰。無慳。最勇健。施為行首。勇而能行。故偏說耳。

唱伽上聲呼字。時入般若波羅蜜門。名持一切法雲堅

固海藏

**疏**伽字。即厚平等性。鈔三十四伽字。若會經者。如

如海平等。能持能包。雲雨說法。智論云。若聞伽字。即知諸法不厚不薄。以伽那。秦言厚。故釋曰。厚薄。

之事。事則已。  
入般若若矣。

唱吒字時。入般若波羅蜜門。名隨願。普見十方諸佛。

**疏**吒字。卽積集性。鈔二十五吒字。別譯爲吒聲字。若會經者。積集念念佛。故能普見。

唱拏字。乃可字時。入般若波羅蜜門。名觀察字輪。有無。

盡諸億字。

**疏**拏字。卽離諸諠諍。無往無來。行住坐臥。謂以常

觀字輪故。鈔二十六拏字。先釋義。後謂以常觀下會經。智論云。若聞拏字。卽知一切法及

衆生。不去不來。不生不滅。不臥不立。衆生空法空。以南天竺云。拏。秦言不故。釋曰。去等。卽是諠諍。無

卽是不。上一二俱不可得。方爲般若。

唱娑蘇統切頗字時。入般若波羅蜜門。名化衆生究竟。

處

**疏**娑頗字。卽徧滿果報。鈔三十七娑頗字。別譯但云頗字。若會經者。化生究竟。方爲徧滿果報。智論云。若聞頗字。卽一切法因果皆空。以頗羅。秦言空。故釋曰。因果俱空。方爲圓滿。亦不可得。

可音得。娑音同前。迦字時。入般若波羅蜜門。名廣大藏無礙。

辯光明輪徧照

**疏**娑迦字。卽積聚蘊性。

鈔三十八娑迦字。別譯爲塞。迦若會經者。蘊積爲廣大藏無礙光輪所積。蘊也。智論云。若聞歌字。卽知一切法五衆不可得。以歌大。秦言衆。故釋曰。五衆卽五蘊也。畧舉一蘊耳。

唱也。夷舸切。蘇舸切。娑字時。入般若波羅蜜門。名宣說一

唱也。夷舸切。蘇舸切。娑字時。入般若波羅蜜門。名宣說一

切佛法境界

**疏也**。姿字。卽衰老性相。鈔二十九也。姿字。若會經者。衰老性。卽佛法境界。兼

餘老成者。菩薩勇猛觀境也。

唱室者字時。入般若波羅蜜門。名於一切衆生界法

雷徧吼

**疏**室者字。卽聚集足迹。謂聚集卽一切衆生。法雷

卽是足迹。義。鈔四十室者字。別譯云室左。文中先釋。義謂聚集卽下。會經。法雷卽是足迹者。

佛所行迹故。智論云。若聞遮字。卽知一切法不動。相義以遮邏。秦言動故。釋曰。以大品云。遮字門。諸

法行不可得。行卽動義。足卽能行。卽因行有迹。迹爲所行。若依此義。法雷徧吼。卽行法也。

唱侘取加字時。入般若波羅蜜門。名以無我法。開曉



衆生

〔疏〕侘字。卽相驅迫性。謂無我曉之。卽爲驅迫。鈔四十一

侘。別譯爲吒。文中先釋義。後謂無我下。會經智論云。若聞吒字。卽知一切法此彼岸不可得。以吒羅

秦言岸故。釋曰。卽無我驅迫。今至彼岸。亦不可得。若約表位。此當等覺故。法身欲滿。始本欲齊。故亡

岸二

唱陀字時。入般若波羅蜜門。名一切法輪差別藏。

〔疏〕陀字。卽究竟處所。謂此究竟處。含藏一切法輪。

然新譯乃是茶字。去聲引之。鈔四十二陀。勸文中

下會經。從然新譯下。會經字音。卽興善別譯也。智論云。若聞茶字。卽知一切法必不可得。以彼茶。秦

言必故。釋曰。唯至究竟。爲必不可得。故般若中。以無所得。則得菩提。又約表位。此四十二當妙覺故。

大品云。茶字門。入諸法邊竟處。光讚云。是陀之門。一切法究竟邊際。盡其處所。無生無成。無有作者。皆菩提意也。若約初發心時。上來從娑字來。皆上便成正覺。則初阿。最後茶。有悟一切法。下有不可得言。今竝畧之。若具。皆如瑟吒字耳。其中難者已釋。餘以經疏相對。文竝可知。更有對會。及修觀儀所得功德。竝別章具也。更有對會下。指廣在餘。於中有三。一對會同異。前已會竟。二修觀儀式。三所得功德。後之二門。皆與善別譯。今當敘之。先明所得功德者。彼文結云。又善男子。如是字門。是能悟入法界邊際。除如是字。表諸法門。更不可得。何以故。如是字義。不可宣說。不可顯示。不可執取。不可了持。不可觀察。離諸相故。善男子。譬如虛空。是一切佛所歸趣處。此諸字門。亦復如是。諸法空義。皆入此門。方得顯了。若菩薩摩訶薩。於如是入諸字門。得善巧智。於諸言音。所詮所表。皆無罣礙。於一切法。平等空性。盡能證持。於

衆言音。咸得善巧。若菩薩摩訶薩能聽如是入諸  
 字門。卽顯字印。聞已受持。讀誦通利。爲他解說。不  
 貪名利。由此因緣。得二十種功德。何等二十。謂得  
 強憶念。得勝慚愧。得堅固力。得法旨趣。得增上覺  
 得殊勝慧。得無礙辨。得總持門。得無疑惑。得違順  
 不生恚。處得無高下平等。而住。得於有情言音善  
 巧。得蘊善巧。處善巧。界善巧。緣起善巧。因善巧。緣  
 善巧。得法善巧。得根勝劣智善巧。得他心智善巧。  
 得觀星曆善巧。得天耳智善巧。漏盡智善巧。得說處非  
 神境智善巧。生灰智善巧。漏盡智善巧。得說處非  
 處智善巧。得往來威儀。施設善巧。是爲得二十種  
 殊勝功德。大般若放光讚大同於此。第三修觀  
 儀式者。彼文標名。大方廣佛華嚴經入法界品。頓  
 證毘盧遮那法身字輪。瑜伽儀軌釋云。夫欲頓入  
 一乘修習。毘盧遮那如來法身觀者。先應發起菩提  
 賢菩薩微妙行願。復應以三密加持身心。則能悟  
 入文殊師利大智慧海。然修行者。最初於空閒處。  
 攝念安心。閉目端身。結跏趺坐。蓮心普緣。無邊刹  
 海。諦觀三世一切如來。徧於一一佛菩薩前。殷勤  
 恭敬。禮拜旋繞。又以種種供具。雲海奉獻。如是一

切聖衆。廣大供養已。復應觀自心。心本不生。自性成就。光明徧照。猶如虛空。復應深起悲念。哀愍衆生。不悟自心。輪迴諸趣。我當普化。拔濟令其開悟。盡無有餘。復應觀察自心。諸衆生心。及諸佛心。本無有異。平等一相。成大菩提。心瑩徹清淨。廓然周徧。圓明皎潔。成。大月輪。量等虛空。無有邊際。復於月輪內。右旋布列四十二梵字。悉皆金色。放大光明。照徹十方。分明顯現。一光中。具無量剎海。一剎海。有無量諸佛。一諸佛。有無量聖衆。前後圍繞。坐菩提場。成等正覺。智入三世身。徧十方。轉大法輪。度脫羣品。悉令現證。無任涅槃。復應悟入般若波羅密四十二字門。一切法。皆無所得。能觀法界。悉皆平等。無異無別。修瑜伽者。若能與是旋陀羅尼觀行相應。卽能現證。毘盧遮那如來智身。於諸法中。得無障礙。

善男子。我唱如是字母時。此四十二般若波羅蜜門。爲首。八無量無數般若波羅蜜門。

〔疏〕結云四十二門者。謂表四十二位故。故智論中。諸位圓融。明初阿。具後諸字。

○第四謙推

善男子。我唯知此善知衆藝菩薩解脫。如諸菩薩摩訶薩。能於一切世出世間善巧之法。以智通達。到於彼岸。殊方異藝。咸綜無遺。文字筭數。蘊其深解。醫方呪術。善療衆病。有諸衆生。鬼魅所持。冤憎呪詛。惡星變怪。死屍奔逐。癩癩羸瘦。種種諸疾。咸能救之。使得痊愈。又善別知金玉珠貝。珊瑚瑠璃。摩尼碑磔。雞薩羅等一切寶藏。出生之處。品類不同。價直多少。村營

鄉邑大小都城。宮殿苑園。巖泉藪澤。凡是一切人衆所居。菩薩咸能隨方攝護。又善觀察天文地理。人相吉凶。鳥獸音聲。雲霞氣候。年穀豐儉。國土安危。如是世間所有技藝。莫不該練。盡其源本。又能分別出世之法。正名辯義。觀察體相。隨順修行。智入其中。無疑無礙。無愚闇。無頑鈍。無憂惱。無沈沒。無不現證。而我云何能知能說彼功德行。

〔疏〕謙推中。推勝。卽就其所知衆藝。寄勝推之。不捨世俗。皆與實相不相違背。會同般若之門。

○第五指後

善男子。此摩竭提國有一聚落。彼中有城名婆坦那。有優婆夷號曰賢勝。汝詣彼問。菩薩云何學菩薩行。修菩薩道。

〔疏〕婆坦那。此云增益。以無盡三昧能出生故。友名賢勝者。賢猶直善。無依道場。直善之最故。

時善財童子。頭面敬禮。知藝之足。繞無數市。戀仰辭去。

〔論〕徧友云。此有童子。名善知衆藝。學菩薩字智者。明徧友是師。童子是學者。依教立名。卽如此方孔丘門人顏回之流。善財致敬。申請所求。童子衆藝。

云。我得菩薩解脫。名善知衆藝。我恆唱持此之字  
母。唱阿字時。此云無也。入般若波羅密門。名菩薩  
威力。入無差別境。明達一切法空門。是菩薩威力。  
斷一切障。入無功智。徧法界衆生界故。唱多字時。  
入般若波羅密門。名無邊差別境。是明一切諸有。  
是差別智。是普賢行。徧知一切三界六道衆生中  
法則。行解。及所宜應化。如是總有四十二般若波  
羅密門爲首。名爲字母。入無量無數般若波羅密  
門。如文自具。

○第四賢勝優婆夷。幻智無依善友



向聚落城。至賢勝所。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。

疏初二可知

賢勝答言。善男子。我得菩薩解脫。名無依處道場。既自開解。復爲人說。又得無盡三昧。非彼三昧法有盡無盡。以能出生一切智性眼無盡故。又能出生一切智性耳無盡故。又能出生一切智性鼻無盡故。又能出生一切智性舌無盡故。又能出生一切智性身無

盡故。又能出生一切智性。意無盡故。又能出生一切智性。功德波濤無盡故。又能出生一切智性。智慧光明無盡故。又能出生一切智性。速疾神通無盡故。

〔疏〕三授已。法門中二。初得解脫。後得三昧。今初直就經文。內外無依。卽是道場。賢首云。梵名那阿賴耶。曼荼羅。那者。此云無也。不也。阿賴耶。云依處也。依止也。曼荼羅。云道場也。圓場也。謂無阿賴耶。染分依處。而有淨分圓場。出生勝德。不可窮盡。卽轉依究竟。顯德無盡故也。下二句。卽二利之用。後得三昧。先名。後非彼下用。卽爲釋名。於中初揀濫。後

以能下。顯是。謂體則雙超。盡及無盡。但從用出生。說無盡耳。然則二門相成。無依道場。卽空如來藏。無盡三昧。卽是不空。要心無依。契於本空。方見不空。具性功德。故云。出生智性眼等。息妄顯出。故曰。出生。出非本無。猶稱智性。

善男子。我唯知此無依處道場解脫。如諸菩薩摩訶薩。一切無著功德行。而我云何盡能知說。善男子。南方有城。名爲沃田。彼有長者。名堅固解脫。汝可往問。菩薩云。何學菩薩行。修菩薩道。爾時善財禮賢勝足。繞無數帀。戀慕瞻仰。辭退南行。

疏指後云沃田者。是南天竺。近水沃潤故。顯無念定水。能滋長故。長者名堅固。解脫者。無著清淨。惑不能壞。卽解脫故。

論賢勝優婆夷者。明世醫方衆術。世及出世。莫不總明。安物養生。無法不了。以居塵俗。方便利生。或作博說世筮。玄占未達。或作良醫善藥。救世不安。辨寶物以定真僞。刊名言而釋文義。奇才異智。莫不普明。鬼魅衆邪。皆能制伏。含普賢之智海。等文殊之法身。佛果處躬。化靈萬有。無方不至。無利不周。無行不行。無生不濟。爲慈悲故。現作女身。智無

不眀號爲賢勝。主禪波羅密門。城名婆怛那者。此云喜增益。此以德立名。以多饒益人多增喜事。雞薩羅寶。此寶爲師子旋毛。得無依處道場者。法無依處。身亦無依。徧萬行故。行無體故。居南印度。

○第五堅固長者。幻智無著善友。

到於彼城。詣長者所。禮足圍繞。合掌恭敬於一面立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。長者答言。善男子。我得菩薩解脫。名無著念清淨莊嚴。我自得是解脫已來。於十方佛。

所勤求正法無有休息。善男子。我唯知此無著念淨莊嚴解脫。如諸菩薩摩訶薩。獲無所畏大師子吼。安住廣大福智之聚。而我云何能知能說彼功德行。善男子。卽此城中有一長者。名爲妙月。其長者宅常有光明。汝詣彼問。菩薩云何學菩薩行。修菩薩道。時善財童子禮堅固足。繞無數市。辭退而行。

**疏**示法門中。先顯名。無著約境。離所知故。無念約心。心體離念。故無煩惱。二障永盡。是曰清淨。淨則能嚴法身。後我自得下。彰用。旣二障不生。則無夢見故。無求求法。無厭無休。鈔第五堅固長者無念約心者。卽以無字兩用。

若無著念二字連釋。則無著約止而不礙念念明記。卽止觀雙行也。亦離二障。則以智斷而嚴法身三德備矣。

論南方有城名爲沃田者。以約此善友。以智德澤資也。人多善增德厚。以立其名。故長者名堅固解脫者。明求法無懈。如下自言。爾時善財詣彼致敬。申請所求。長者云。我得無著清淨念莊嚴。明第六般若。無相智慧。莊嚴諸念。卽於一切法念自無著也。

○第六妙月長者。幻智智光善友

向妙月所禮足圍繞。合掌恭敬。於一面立白言。聖者。

我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。妙月答言。善男子。我得菩薩解脫名。淨智光明。善男子。我唯知此智光解脫。如諸菩薩摩訶薩。證得無量解脫法門。而我云何能知能說彼功德行。善男子。於此南方。有城名出生。彼有長者名無勝軍。汝詣彼問。菩薩云何學菩薩行。修菩薩道。是時善財禮妙月足。繞無數匝。戀仰辭去。

**疏**眞智廓妄。名爲淨智。後智照法。名爲智光。能淨能光。若秋空滿月。故名妙月。



論此城中有一長者名妙月者。明此中長者。會第六無相智慧門。以方便波羅密爲一體。故明十地已前第六地。三空無相智慧門。是出世間解脫十地已後十一地中三空寂滅智慧門。是處世間成第七方便波羅密。與大慈悲。一體無二。以從大慈悲母智幻所生。此最後地。十住十地中七八二位相融。此十一地中六七兩位和融一體。須知升進形勢如是。善財在詣致敬頂禮。申請所求。妙月長者云。我唯知此淨智光明解脫者。是妙月長者。約德立名。慈悲智光。是破惑義。以破世間衆生惑故。

因慈悲利生破惑立名。此明三空慈悲淨智總一體用圓滿故。

○第七無勝軍長者。幻智無盡相善友。

漸向彼城。至長者所禮足圍繞。合掌恭敬於一面立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。長者答言。善男子。我得菩薩解脫。名無盡相。我以證此菩薩解脫。見無量佛。得無盡藏。善男子。我唯知此無盡相解脫。如諸菩薩摩訶薩得無限智無礙辯才。而我云何能知能說彼功德。行善

男子於此城南有一聚落。名之爲法。彼聚落中有婆羅門名最寂靜。汝詣彼問。菩薩云何學菩薩行。修菩薩道時。善財童子禮無勝軍足。繞無數匝。戀仰辭去。

〔疏〕法門之名。卽所成德相。無窮盡故。我以證下。以用釋名。得無盡藏。謂聞諸妙法。又諸心境。無非佛法故。若佛若法。皆無有盡。旣見佛得法。無盡故。無能勝。衆德所聚。從喻如軍。亦能普勝諸魔軍故。皆從體出。故城名出生。

〔論〕南方者。依初釋。有城名出生者。表第八願波羅密。出生諸法。及衆行故。長者名無勝軍者。表勝一

切無明。憍慢。生。死。邪見。惡賊。魔軍。故。善財。往。詣。禮。敬。申。請。所。求。長。者。答。云。我。得。菩。薩。解。脫。名。無。盡。相。者。明。一。切。心。境。總。如。來。相。於。一。毛。處。念。念。出。生。無。盡。諸。相。無。念。理。中。智。幻。所。生。何。有。盡。相。

○第八最寂靜婆羅門。幻智誠願語善友

漸次南行。詣彼聚落。見最寂靜。禮足圍繞。合掌恭敬。於一面立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。婆羅門答言。善男子。我得菩薩解脫名誠願語。過去現在未來菩薩。以是語。

故乃至於阿耨多羅三藐三菩提無有退轉無已退。無現退。無當退。善男子。我以住於誠願語故。隨意所作。莫不成滿。

**疏**授法中。先標名。有二義故。一始終無妄故。如從初發心。立弘誓言。必如言行。不乖先語故。二者隨行不虛故。如忍辱仙人言。我不瞋。令身還復。後過去下。以用釋名。卽如次釋前二義。虛誑言息。故云寂靜。寂靜卽爲淨行。言行君子之樞機。苟能誠實。斯則可法。故城名爲法。鈔第八最寂靜。卽如次釋前二義者。先釋始終無妄。後善男子。我以住是下。釋隨行不虛。心行稱言。故所作成滿。通二利滿。虛誑言息。下以法釋名於中。

初釋最寂靜。次寂靜卽爲淨行。釋婆羅門後言行君子之樞機。下釋其城名。然此一句卽周易繫辭君子曰君子居其室出其言善則千里之外應之况其邇者乎。居其室出其言不善則千里之外違之况其邇者乎。言出乎身加乎民行發乎邇見乎遠言行君子之樞機。樞機制動之主。樞機之發榮辱之主。言行君子之所以動天地也可不慎乎。雖爲外典意與斯合。但所行內外異耳。

善男子。我唯知此誠語解脫。如諸菩薩摩訶薩。與誠願語行止無違。言必以誠。未曾虛妄。無量功德因之。出生而我云何能知能說。善男子。於此南方有城名。妙意華門。彼有童子。名曰德生。復有童女。名爲有德。汝詣彼問。菩薩云何學菩薩行。修菩薩道。

疏指後云妙意華門者。妙意華者。卽蘇滿那華。其

城門側有之故。亦在南天。當受其訓。得求友之妙意。勝因之華。故童子表於淨智。智則萬德由生。童女表於淨悲。悲爲衆德之本。以悲智相導。故二人同會。會緣之終。此二滿故。將見慈氏紹佛位故。緣之終。此二滿者。卽悲智滿。言將見慈氏紹佛位者。慈氏悲滿。佛位智滿耳。

時善財童子。於法尊重。禮婆羅門。足繞無數。而戀仰而去。

**論**此城南有一聚落。名爲法者。衆人所居。名之聚落。以無體性。名之爲法。取其寂靜。名之中有婆羅門。名最寂靜者。姓之及名。總皆寂靜。表力波羅密。

隨俗不俗。衆會不誼。名爲力用自在。善財往詣致  
敬頂禮。申請所求。云我得菩薩解脫名誠願語者。  
誠是實也。明所願依言誠實。無虛妄言。此是信士。  
語從心願。所言依真。而無虛誑。語言體真也。所願  
皆真。故名句文及聲。言辭及所說。一切皆性真故。  
此爲解脫。此是法師位。表法界爲聚落。一切言說  
自真人。法悉皆如。然表言不虛也。

大方廣佛華嚴經疏論纂要卷第一百之十二



白雲寺比丘道廓募衆比丘弘禪素光  
太進興進通慎正宣信士吳大亨劉節  
卽水南街那羅延室尼如敬翫仝刻  
華巖經入法界品疏論纂要第一百之  
十二卷伏願衆等入毘盧之性海修普  
賢之行門圓滿菩提溥資恩有  
康熙二十二年八月 日華藏室謹題